



5. marts 2010

UPA2010/42

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiupparput:

Nunani allani ilisimatusarfiit suleqatigalugit Ilisimatusarfimmi ilisimatusarfigineqarsinnaasut saniatigut interneti atorlugu ungasianiit ilisimatusartoqarsinnaanera pillugu Naalakkersuisut misissueqqullugit peqquneqarnissaannut aalajangiiffigisassatut Inatsisartunut siunnersuut.

(Inatsisartunut ilaasortaq Justus Hansen, Demokraatit)

Tunngavilersuut:

Demokraatit isumaqartuaannarpugut pingaartorujussuusoq inuusuttut sapinngisamik amerlanerpaat ilinniagaqarpata, taamaasiorutta inuiaqatigiinni atorfiit pingaarutillit nunaqavissunik inuttalersinnaalissagatsigit. Ullumikkut Ilimmarfeqarpugut, arlalinnik ilinniartuarnissaq kiisalu ilinniarsinnaasat pioreersut nutartertuartariaqartut, ilinniakkap pitsaassuaa eqqarsaatigalugu nunat allat unammillersinnaajumallugit.

Ilisimatusarfinnut allanut ilinniartortoqarsinnaavoq Ilimmarfik ikiortigalugu, soorlu Danmarkimi, Frankrigimi Alaskamilu ilisimatusarfinni fagit ataasiakkaat ilisimatusarfigineqarsinnaapput. Aammali Demokraatini isumaqarpugut, teknologiip iluani siunissaq isumannaarniartariaqaripput. Imaatigut kabeli pereerparput, tamatuma kinguneranik IT-mik atuinermi periarfissat angisoorujussuanngornikuupput.

Demokraatini taamaattumik isumaqarpugut Naalakkersuisut misissortariaqaraat Amerikami avannarlermi Europamilu ilisimatusarfiit amerlanerit suleqatigineqarsinnaanersut. Aamma ilanngullugu misissorneqarsinnaavoq Islandi Savalimmiullu suleqatigineqarsinnaanersut.

Siunnersuut aqutigalugu aamma misissorneqassaaq, Ilimmarfimmi ilisimatusartut interneti atorlugu ilisimatusarfinni allani fagini ataasiakkaani ilinniartitsineq malinnaavigisinnaaneraat. Siunnersuutip nassataanik Ilimmarfimmu pisaartariaqassapput IT-mi atortut nutaat.

Siunnersuulli pivisunngortinneqarsinnaappat tamanna naggataatigut Ilimmarfimmu sipaarutaasussaavoq, ilinniarnert immikkoortuisa nutaat aallartilneri tamarluinnaasa ilungersortoqartaqimmat ilinniartitsissarsiorluni kiisalu nunarsuup sinnerani ilinniakkat qaffasissut assigiinngitsut tunngavigalugit ilinniagassanik pilersarusiortoqartarmat. Aaqqiissutit akisuut danskit ilisimatusarfianneersunik, ineqartussanik angalasussanillu Namminersorlutik Oqartussat akiligaannik, ilinniartitsisunik attartorluni ingerlanneqartartut sipaarfigineqarsinnaanngussapput

Taamaattumik nunarsuarmi ilisimatusarfittut tatiginarluartutut siunissami Ilimmarfiup tusaamasanera inissisimarngalu qulakkeerumallugu pingaartorujussuavoq, ilisimatusartut



amerlanerusunik periarfissinneqarnissaat. Siunnersuut akuersissutigineqassappat ilisimatusartut ilisimatusarfinni allani faganut allaanerusunut unaminanerusunullu malinnaasinnaalissapput. Tamanna pinngitsoorani Kalaallit Nunaannut iluaqusiisussaavoq tangilimmik. Qaavatigut ilinniagassat amerlanerit pissaganartut pissarsiarineqarsinnaapput nunagisaq qimanngikkaluarlugu.

Ilisimatusarfik pillugu Inatsisartut Inatsisaat nr. 19 19. November 2007-meersoq ilaatigut imatut imaqarpoq:

”§ 1. Ilisimatusarfiup suliassarai Ilisimatusarfimmi ilinniagassat iluanni ilisimatuutut misissuinissaq aamma ilisimatusarnermik tunngavilimmik ilinniartitsinissaq nunani tamani annerpaamik angusassaq tikillugu. Ilisimatusarfiup qulakkiissavaa ilisimatusarnerup, inerisaanerup aamma ilinniartitaanerup naligiillutik suleqatigiinnissaat, kiisalu ilisimatusarnermi aamma ilinniartitaanermi ilinniagassanik ingerlatassaminik ingerlaavartumik inerisaanissaq aamma siaruarterninissaq ilisimasanillu ilisimatusarnermi suleriaatsinik paasisanillu paarlaasseqatigiinnissaq...”

kiisalu:

” Imm. 3. Ilisimatusarfiup inuiaqatigiit avatangiisigineqartut suleqatigissavai aamma nunat akornanni suleqatigiinnermik inerisaaqataassaaq.”

Ilisimatusarfik pillugu inatsimmi allassimareerpoq, ilinniartitsisoqassasoq nunarsuarmi qaffasinnerpaamik piumasaaqataasut aallaavigalugit kiisalu inuiaqatigiit eqqaamiusut suleqatigalugit nunarsuarmi suleqatigiinnermut peqataassasoq.

Siunnersuut inatsimmut pioreersumut akerliunngilaq, periarfissalli amerlineqaannassapput, matumanilumi naatsorsuutigineqarpoq Ilimmarfiup suleqatigineqarsinnaasunik ikorfartuinissaa ilisimatusarfinnut allanut ilisimasaqarnini tunngavigalugu.

Taamatut oqarluta Naalakkersuisut akissuteqarnissaat kiisalu partiit allat saqqummiussassaat qilanaarluta utaqqissavagut.